

EUSKARALDIA UDAL ELKARTEAREN BARRUAN SUSTATZEKO ERAKUNDE-ADIERAZPENA

Azken neurketek baieztatu dutenez, euskararen ulermena eta ezagutza zabaltzen ari dira Euskal Herriko inguru ezberdinetan. Euskaraz hitz egiteko gai den jende gehiago dago, eta euskara ulertzen dutenak ere gero eta gehiago dira. Bi datu horiek aditzera ematen digutenez, euskarazko harremanak areagotzeko baldintza onak daude.

Horrela bada, euskararen erabilpen maila handiagoa sustatu eta praktika linguistiko berriak bultzatzen dituzten testuinguruak sortzeko beharra dagoela ikusten da.

Eta horixe da Euskaraldia, Eusko Jaurlaritzako Hizkuntza Politikarako Sailburuordetzak eta Topaguneak beste hainbat eta hainbat eragilerekin elkarlanean, erabilera eta praktika linguistiko berriak sortzeko abian jarri dugun ekimena. Ezagutzatik erabilerarako jauzia emateko garaia da, euskararen alde egotetik euskararen alde egiteko garaia.

Euskaraldia Euskal Herri osoan egingo den arren, tokian tokiko euskaltzale eta erakundeak izango dira herri bakoitzeko dinamiken sustatzaileak. Gure bailarako herrietan ere osatu dira ekimen hori garatzeko batzordeak.

Ekimen horretan 11 egunetan hizkuntza-praktika berri bat gauzatzera gonbidatuko ditugu herritarrak. Ariketa horren subjektuak 16 urtetik gorako helduak izango gara eta 11 egunez helduen hizkuntza-ohiturak aldatzeko ariketa kolektibo bat egitea da proposamena, ulermena balioan jarrita. Bi subjektu mota bereizi dira: ahobiziaz eta belarriprestak.

Ahobiziaz izango dira 11 egun horietan euskarari eutsiko diotenak solaskideak euskaraz ulertzen duen guztietan, eta, belarriprestak, berriz, solaskideak gonbidatuko dituzte berarekin euskaraz aritzera, nahiz eta Belarriprestak euskaraz edo gaztelaniaz erantzun.

Ekimenaren helburua da, besteak beste, ariketa praktikoa horren bidez ikusaraztea eta biziaraztea hizkuntza-ohiturak alda ditzakegula, eta, ahal dela, 11 egun horiek pasa ostean, hizkuntza-praktika berri horiei eustea.

Hori guztia norberaren erabakiak errespetatuz, adeitasunez eta guztiak eroso sentitzeko moduan.

Euskaraldia Gipuzkoako Foru Aldundian, udaletxeetan eta mankomunitateetan

Gure udalerrietan (Aia, Getaria, Orrio, Zarautz eta Zumaian) eta Gipuzkoan, orobat, erabileran eragiteko baldintza soziolinguistiko egokiak ditugu. Eta horrek ardura eta erantzukizun berezia ematen digu Euskaraldian.

Gure bailaran (Aia, Getaria, Orio, Zarautz eta Zumaian) bizi den 2 urte edo gehiagoko biztanleriaren %76 euskalduna da eta beste %10 gai da euskara ulertzeko. Gipuzkoan biztanleriaren %57,4 euskalduna da eta beste % 15,9k euskara ulertzen du.

Administrazioari dagokionez, Udal Elkarteko Zuzendaritza Batzordeko ordezkari politikoen %100 gai da euskaraz hitz egiteko eta udal langile publiko guztiak ere bai.

Gipuzkoako ordezkari politikoen %86,8 gai da euskaraz hitz egiteko eta beste %3,6 ulertzeko, eta langile publikoen %86,8k hitz egiten du euskaraz.

Baina erabilera-datuek diote gure bailaran etxean eta kalean euskararen erabilera batez beste %50 ingurukoa dela eta Gipuzkoan 16 urtetik gorakoen %39,5ek hitz egiten duela euskaraz. Badugu non hobetu, eta horretan lagunduko digu Euskaraldiak.

Aipatutako datuak eta Gipuzkoako eta gure bailarako egoera soziolinguistikoa aintzat hartuta, Euskaraldia, aukera egokia dugu erakunde publikoek, eta, beraz, arduradun politikoek dagokigun erantzukizuna geure gain hartzeko eta eredugarritasunez jokatzeko, erabileran urrats berriak egite aldera.

Horregatik guztiagatik **Urola Kostako Udal Elkarteak honakoa adierazi nahi du:**

ERAKUNDE ADIERAZPENA:

- Urola Kostako Udal Elkarteko Zuzendaritza Batzordeak **bat egiten du Euskaraldiarekin** eta ekimenaren sustatzaile izango da. Horrenbestez, **erantzukizunez** eta **eredugarritasunez** jokatzeko konpromisoa hartzen du.
- Ordezkari politikoon **egiteko nagusia** izango da Euskaraldiaren markoan eta **bereziki Udal Elkartearen barrura begira ekimena zabaltzea**. Horrenbestez, ekimen honetan ahalik eta *ahobizi* eta *belarriprest* gehien aktibatzeko urratsak emango ditugu, arduradun politikoak izan nahiz langileak izan.
- **Ahobiziot** euskara ulertzen duten guztiekin euskaraz aritzeko konpromisoa hartzen dugu.
- **Belarriprestok** gainerakoak gonbidatuko ditugu gurekin euskaraz egin dezaten, nahiz eta guk euskaraz edo gaztelaniaz erantzun.
- Urola Kostako Udal Elkarteak **neurriak hartuko ditu hizkuntza-praktika** horiek posible izan daitezen eta praktika **horiei etorkizunean eutsi ahal izateko**.
- Urola Kostako Udal Elkarteak, **Udal Elkartearen barruan ez ezik Udal Elkarte osatzen duten udalerrietan ere**, ekimenaren sustatzaile gisa, herritarrak gonbidatuko ditu Euskaraldiko ekimenean parte har dezaten eta izena emateko bideak erraztuko ditu.

- Urola Kostako Udal Elkarteak, bat egiten du **ekimena Gipuzkoan elkarrekin, elkarlanean eta batera garatzearekin**, lurralde mailako politika bateratu bati begira, ahalik eta udal gehienetan, mankomunitateetan, Gipuzkoako Foru Aldundian eta Gipuzkoako Batzar Nagusietan.

2018ko uztailaren 5a

Urola Kostako Udal Elkarteak
Zuzendaritza Batzordea

